

- Sed neque dicendo placeo tibi nec faciendo.
 Verbo non prosum, reus autem si taceo sum:
 Sic miser ignōro quid agam, dubiusque laboro.
- 55 O quam molē gravi premitur mens conscia pravi!
 Hei michi, quid feci, que qualia semina jeci!
 O quales messes meterem, nisi tu pius esses!
 Nullus dampnatus fuit umquam tam sceleratus,
 Sed neque dampnandos adeo reor esse nefandos:
- 60 Nemo meis igitur par peccatis reperitur,
 Nec despero tamen. sed adhuc expecto juvamen,
 Voce loquens humili: Fer opem, patris unice fili!
 Ad te suspiro, deus, et tua dona requiro,
 Qui desperatis confers tua munera gratis.
- 65 Tu condempnasti merito crimen protoplasti,
 Sed licet iratus fueris, tamen es miseratus.
 Quippe videns hominum genus ad mala queque supinum,
 Ire sub inferna pro traditione paterna,
 Ut nos erigeres celoque locare valeres,
- 70 Celo descendis, homo factus pro redimendis,
 Natus mirifice de virginea genitrice.
 Que vite porta quamquam sit regibus orta,
 Quando narratur stirps regia vel numeratur,
 Thamar in hac serie censetur et uxor Urie,
- 75 Utraque peccatrix legisque sacre violatrix.
 O quam prudenter factum, quam convenienter,
 Ut peccatores habuisses progenitores,
 Per quem salvandus peccator erat miserandus.
 Numquid, flos Jesse, non vis hujus memor esse?
- 80 An non et memor es, quantos in carne labores
 Propter me tuleris? non ergo michi misereris,
 Pro quo sudasti. flagra, sputa, crucem tolerasti?
 Ne, queso, domine, me proicias sine fine,
 Quem moriens redimis de mortis faucibus imis,
- 85 Et memor esse satis potes illius pietatis,
 Qua latro salvatur, cum discipulus reprobatur.
 Hoc etiam, care Jesu, pariter memorare,
 Quod cum vicisti mortem victorque redisti,
 Quam tu mundasti, de qua prius ipse fugasti
- 90 Septem demonia, te vidit primo Maria:
 Quo facto pandis, quod iniquis justificandis
 Omnia fecisti, Jesu, quecumque tulisti.
 Quicquid fecisti. nobis factum voluisti:
 Natus, passus, obis, surgis, subis ethera nobis,